

't Is gin bal waard

door Engel Reinhoudt

“Katrien”, zei moeder, “zie je daè die twî onden bezig? Nou, zô gaè het noe. Dienkt ‘r om dat het je nie overkomt voe a je etrouwd bin.” “Daèmie was de seksuele voorlichting ten einde. Nog gin alf jaer laeter most Katrientje getrouwe. Een ôôp trammelant natuurlijk. D’r moeder zei nog da ze het nog zô ezeid ao. “Ja”, zei Katrien, “mae die ondjes deeë het langs achter en Jaap zei dat het langs voren gin kwaed kon en...” “Die smeerlap è je d’r in eluisd, afijn at ’n dan noe mae voe een uus zurgt, dan komt het aol wee wè goed.”

Vroeger wier d’r nauwlijks of zeêr bedekt esproke over seks. Bovenstaend verhaaltje komt dan ok voe d’n dag vele jaeren naedat het gebeurd is. Katrien d’r kleinguus bin beter voor’elicht net as aolle jeugd van tegenwoordig. Je klappert mie j’n oaren a je oart en leest oe a dat tegenwoordig gaèt. Ze kunne amper alleêne pisse of ze doe a an seks. Ze kleêe d’r eigen uut voe de computer, ze skype d’r schaemte naè ‘k weet nie oe vare wig en vervolgens bin ze glad veraltereerd a eên of andere vriend dat laèt zie an z’n vrienden op facebook.

Ik verbaeze m’n eigen ok over de directheid van de taal die a ze gebruke. A je vroeger j’n ôôge op een meisje laete vaolen ao, dan raep’n je aolle moed bie mekaore en dan vroeg je fersoelijk of a je ze naèr uus mocht brienge. Mie een bitje geluk mocht dat, mae die keêr a ze zei: “‘k Wete de pad wè alleêne”, bin ‘k toet op vandaeg nie vergete. Noe oar en lees ik (in een blad in de wachtkaemer van ’t zieken’uus) da ze gewoon tegen mekaore zegge: “Ik wille mie je neuke.” En a ze dat dan doe, dan maeke z’ondertussen een selfie. Dan mô je toch verrekt andig weze. Ik è nog moeite om in m’n eêntje, mie twî anden vrie, d’r gewoon eên op te bellen op m’n mobieltje, laèt stae teglieke een foto te nemen. Ik mô d’r trouwens nie an dienke da je mie eêl je bloate ebben en ouwen op de foto zou motte. De bezienswaardigheden in het echte Reuzengebergte lieke me toch interessanter.

Wat a ok opvaolt is a ze tegenwoordig, ok op televisie, zo makkelijk scheld- en stopwoorden gebruke die a ok mie geslachtsorganen te maeken è. A t’r wat mislukt of tegenvaolt is het direct kut en nog es kut. A je dat vroeger ezeid ao, dan ao je a een oplawaaier ehad voe a je bie de t was. Noe kiek je d’r nog nauwelijks van op, oewel a’k het varre van beschaefd vinde. Opmerkelijk is dat de scheldwoorden verschove bin van het mannelijke naè het vrouwelijke. Was t’r iets nie in orde of viel d’r wat tegen dan was het “‘t is gin bal waard, daè is gin zak an, ’t is naè de kloaten.” Noe wor direct het vrouwelijk geslachtsorgaan in de mond enome, om het zômae es uut te drukken. ’t Bin aorige diengen. En dan è me het nog nie ehad over fuck en fuck joe. Ik ouwe het verlôpig dan toch mae liever bie hosternokke.

Reacties: Werrilaan 21, 4453 CA 's-Heerenhoek. E-mail:cn.zeeuws@zeelandnet.nl. Nae een maend is dit stikje ok nae te lezen op www.zeeuwsezanger.nl